

նկատելով իր նպատակին, Գերպ. Աբրահոր հրամանով կը գնէ հող կայարանին մօտիկ, և իր անխոնջ աշխատութեամբ և անմիջական հսկողութեամբ կանգնել կու տայ Միաբանութեանս ծախքով եկեղեցի և առաջնորդարան դպրոցով միասին: Եւ մինչ նոր աւարտած՝ կը սկսէր տեսնել այլևս եկեղեցւոյ օծման պատրաստութիւնները, յորում իր յոգնութեանց պտուղը պիտի քաղէր ուրախութիւն և մխիթարութիւն, ահա վերահաս համազգային սարսափելի աղէտը, տարագրութիւնը... ու անձնանուէր Հովիւը համակերպելով Նախախնամութեան անքնին կամքին կը սկսի իր սիրելի հօտին հետ անկոխ ճամբայ մը կտրել դէպ ի նոր Գողգոթայ: Հ. Աւետիք Վ. Ըլլալով «այր հաւատոց»՝ այդ տառապանքի կեանքը նկատեց իրեն առաքելական կարեւորագոյն ասպարէզ մը. աստուածավառ եռանդով ու չարքաշ՝ նետուեցաւ ամէն կողմ, թէ՛ իր տարաբախտ հօտին և թէ՛ բախտակից բազմաթիւ հայորդիներու բարոյական և այլ ամէն կերպ աջակցութիւն մատուցանելու՝ ճշմարիտ հովուի մը գիտակցութեամբ. երբեք չնայելով որ իր այդ անձնանուիրութիւնը և համարձակ վարարեցումը օրուան թուրք վարիչներու հետ, ահաւոր նեղութեանց ու չարատանջ մահուան կրնային յանգիլ:

Տարի մը Գոնիայի կողմերը խոստովանողի կեանք անցընելէ վերջ՝ աստուածային յատուկ ողորմութեամբ, Վեր. Հ. Մեսրոպ Վ. Սահակեանի մահէն ետք կը վերադառնայ ի Պոլիս և կը ստանձնէ Միաբանութենէս յանձնուած Մեծաւորութեան պաշտօնը (1917-1920): Բայց քիչ յետոյ դարձեալ ընտրուելով անդամ Ուխտիս վարչական ժողովին՝ կը թողու Պոլիսն ալ ու կուգայ Ս. Ղազար, ուր կը մնայ մինչև վերջ: Այս շրջանիս կ'ունենայ ի վաճառորդ կարեւոր ծառայութիւններ: Առաջիկայութեան հետ կը վարէ բաւական ժամանակ վանքին Գործակալութիւնը: Այլ և յոյժ թանկագին եղան մատուցած բարոյական ծառայութիւնները: Յատկապէս ճանչցուած և ընդհանրութենէն յարգուած ըլլալով իրրե խղճամիտ, ներանձնասէր և կրօնաւորական ողջ սկզբունքներու տէր, ամենքը կը նկատէին զինքը իրրե հայր: Իր վայելած այս հանգամանքովը եղաւ ընտիր խորհրդատու իրեն ղեմոյններուն և տարիներով վարեց Խոստովանահայրութեան և Հոգ. Հայրութեան պաշտօնը՝ վանքի քահանայից և աշակերտաց, ինչպէս նաև Մ. Ռափայելեան սաներու համար:

Հ. Աւետիք Վ. ի այս բարեմասնութիւնները գնահատուած են նաև արտաքին անձերէ: Եւ յիշուի իր ուղիղ, ողջամիտ և բարեացակամ վարմունքին ու գործերուն համար արժանացած էր ժամանակակից Հայ. Կաթ. Գերերջ. Պատրիարքներու, Գերպ. Թեմականներու, ընդհանուր կղերին և ժողովուրդին մասնաւոր համարման և յարգանքին: Նոյն իսկ Հայութեան միւս հատուածները, ըլլայ կղեր կամ ժողովուրդ՝ որոնց հետ շփում ունեցած էր, մեծապէս կ'ակնածէին իրմէ՝ ծանրախոհ վարմունքին և աստիճանին վայել ձիրքերուն համար:

1929-ի Ընդհ. Ժողովը, յորում կ'ունենայինք Միաբանութեանս նորընտիր Ընդհանրական Աբրահայր Գերպ. Տ. Տ. Յովհան Վ. Աւգեր, կ'ընտրուէր նաև Վ. Հ. Աւետիք Վ. Գազէզեան Ընդհ. Աթոռակալ և Առաջիկայ: Սակայն չկրցաւ Ուխտս այս անգամ վայելել անոր թանկագին աջակցութիւնը և օգտուիլ այնքան միաբանասէր խորհուրդներէն՝ վերահաս անողոր հիւանդութեանը պատճառաւ, որ և հուսկ խեց զինք մեզմէ դժբախտաբար վախճան դնելով անոր աստուածանուէր քայլերուն ու վշտահար թողլով զՄիաբանութիւնս:

Հանգուցեալը որքան որ կեանքէն կարեւորագոյն մաս մը նուիրեց առաքելական գործունէութեան և վարչական գործերու, սակայն գիտցաւ միանգամայն օգտագործել պարագաները ուսումնական աշխատութեամբ ալ ըստ կարելւոյն պարապելու: Իր նախասիրած նիւթերն էին Հայ Եկեղ. Պատմութիւն և Հայ Հնախօսութիւն: Գրած